

太上洞玄靈寶昇玄消災護命妙經

稽首歸依衆妙道 至心恭敬二玄眞
今運一心心所議 粗識此經經所因
空色色空無有性 有無無有色空均
慧風出自天尊力 掃除心界不遺塵
唯願神光常擁護 證明今日守心人
今日守心何所證 不失凡身得道身

爾時

元始天尊。在七寶林中。五明宮內。與無極
聖衆。俱放無極光明。照無極世界。觀無極

衆生。受無極苦惱。宛轉世間。輪迴生死。漂
浪愛河。流吹慾海。沉滯聲色。迷惑有無。無
空有空。無色有色。無無有無。有有無有。終
始暗昧。不能自明。畢竟迷惑。天尊告曰。
汝等衆生。從不有中。有不無中。無不色中
色。不空中空。非有爲有。非無爲無。非色爲
色。非空爲空。空即是空。空無定空。色即是
色。色無定色。即色是空。即空是色。若能知
空不空。知色不色。名爲照了。始達妙音。識
無空法。洞觀無礙。入衆妙門。自然解悟。離

諸疑網。不著空見。清淨六根。斷諸邪障。我_帝
即爲汝說是妙經。名曰護命。濟度衆生。傳
教世間。流通讀誦。即有飛天神王。破邪金
剛。護法靈童。救苦真人。金睛猛獸。各百億
萬衆。俱侍衛是經。隨所供養。捍厄扶衰。度
一切衆生。離諸染著。爾時
天尊即說偈曰 視不見我 聽不得聞

離種種邊 名爲妙道